

欽定剿平粵匪方略

欽定剿平粵匪方略卷三百六十七 甲子年

三月十二日 壬子 左宗棠奏冒杭州餘杭兩城踞

逆經官軍於二月二十一日攻剿克獲大勝後
勢極窮蹙蔣益澧親督水陸各軍於二十三日
乘勝奮攻慶春艮山武林等門晝夜未息賊膽
愈裂是夜啟武林門向德清一路竄走蔣益澧
督隊入城殺斃賊匪無算當於二十四日將杭

州省城克復餘杭之賊亦於是日由東門逃竄
臣於二十一日戰勝後知賊竄必速卽豫飭各
營整隊以待是日見城中火起各營分路跟追
至瓶窰鎮逆賊憑壘死拒臣親率各營前往追
勦俟將瓶窰竄賊肅清再進省垣布置一切所
有克復兩城詳細情形容俟查明再行具奏奏

上命議政王軍機大臣傳諭曾國藩左宗棠李鴻章
沈葆楨曰杭州敗匪竄向德清餘杭敗匪亦竄踞
瓶窰鎮左宗棠現擬親赴瓶窰鎮督剿著卽迅速
進攻務乘該逆喘息未定將此股悉行殄除其竄
往德清之賊亦著左宗棠派兵剿除毋留餘孽昨
據左宗棠奏稱淳安威坪股匪續圖竄越江西者
現仍折回甯國竄入湖州之孝豐縣侍逆亦由甯

國竄入湖州等語是各路悍黨歸併一處正宜乘此軍威四面兜剿著左宗棠速派兵將進規湖郡以期一鼓殲除肅清浙境左宗棠剿辦甌窰之賊又須赴杭城布置兼須進剿湖郡用兵處所甚多且距浙省邊界漸遠賊氛四逼深恐或有疏虞所有浙江及江西交界邊防著曾國藩左宗棠會商妥籌兼顧嚴斷賊匪竄越之路廣信一帶著沈葆

楨分布兵勇嚴密堵扼以防湖郡敗匪竄入蘇省
常郡尙未克復楊庫股匪爲數衆多屢諭左宗棠
分兵替防嘉興海鹽等城以便李鴻章所部併力
勦辦蘇境之賊惟湖州一城悍賊麕聚若徒以浙
師圍攻恐悍賊尙得伺隙旁竄著李鴻章酌調兵
勇會同浙師夾攻以期迅速克復

上諭內閣曰杭州餘杭兩城踞逆經官軍於二月二

十一日攻勦得獲大勝賊勢極爲窮蹙蔣益澧親督各軍於二十三日乘勢奮攻慶春艮山等門晝夜不息賊膽愈寒是夜啟武林門向德清一路竄走蔣益澧督隊入城殺賊無算卽於二十四日將杭州省城克復餘杭之賊亦於二十四日由東門逃竄經左宗棠豫飭各營整隊以待是日見城中火起各營分路跟追餘賊敗竄瓶窰鎮此次官軍

將杭州餘杭二城同日克復辦理甚爲得手所有
竄逸餘匪卽著左宗棠督飭兵勇迅速追剿盡殲
醜類毋留餘孽閩浙總督左宗棠自督辦浙省軍
務以來連克各府州縣城池茲復將杭州省城餘
杭縣城攻拔實屬調度有方著加恩賞加太子少
保銜並賞穿黃馬褂浙江布政使蔣益澧自調任
浙江戰功卓著屢拔堅城茲復親督各軍克復杭

州省城實屬奮勇異常著賞穿黃馬褂以示優獎
所有在事出力將士著左宗棠查明擇尤保奏

臣等謹案浙省被陷以來居民備遭蹂躪

朝廷軫念民依

獨申乾斷

特命左宗棠督辦浙省軍務

授鉞專征

宸算旣周兵威丕振遂使槐雲濁霧次第掃除茲又
攻克省垣并復要邑兩浙郡縣漸就肅清出
民水火而登衽席非我

皇上知人善任曷克臻此哉

十三日癸丑馮子材魁玉奏言臣等前調揚營兵

勇渡江會攻丹陽當派總兵陶茂森帶馬隊前
赴西南一帶察看賊情三月初五日馳抵東昌

街遇賊接仗殲斃數十名是日諜知提臣鮑超
已由東壩拔隊前來臣等又派副將楊青山率
兵勇三千餘名剋日前往會剿初六日陶茂森
從東昌街直擣句容之北賊匪出巢抗拒我軍
分投抄擊火器齊施殺賊數十名初七日官軍
直薄北門該逆大股蟻擁而出陶茂森揮衆四
面截殺斃賊無算我軍直抵城下時鮑超一軍

已由南門攻復句容縣城查句容一城與丹逆
互爲犄角實鎮防肘腋之患現經克復則西南
一路軍情較鬆亟宜進規丹陽並察看金壇形
勢與鮑超聯絡聲援相機辦理惟寶堰屯句一
帶逆壘未盡掃除當飭陶茂森等迅速進剿一
面函飭總兵詹啟綸等趁此逆情悚懼悉力環
攻毋稍觀望奏入

上命議政王軍機大臣傳諭曾國藩富明阿李鴻章
馮子材魁玉曰鮑超由東壩進剿句容馮子材等
復派陶茂森各軍由東昌街直擣句容之北沿途
截殺進薄北門鮑超之軍已由南門攻入立將縣
城克復句容與丹陽互爲犄角此次鮑超督軍進
徧一戰而下堅城勦辦甚爲迅速深堪嘉尙該軍
出力人員及鎮城會剿之軍著曾國藩查明彙案

保奏惟句容餘賊竄往何處未據馮子材等奏明
著飭鮑超等速行追剿丹陽之賊此時必聞風喪
膽攻剿更易爲功曾國藩卽檄飭鮑超移得勝之
師直擣丹陽使該逆不遑喘息富明阿所派渡江
兵勇先後八千餘名層啟綸已直抵丹陽北門外
富明阿卽飭該總兵與鮑超之師南北夾擊迅圖
攻拔毋稍遲延馮子材以寶堰屯甸一帶逆壘未

平飭陶茂森移軍埽蕩著迅將該處逆壘削平卽
行乘勝併攻丹陽以期功收破竹其金壇一城如
機有可乘各路官軍亦可分兵掩襲使各城次第
收復李鴻章派攻常郡之師前以賊氛內竄致稽
戰事此時丹句敗逆更恐窮極鋌走思犯毗陵如
能早將常郡攻克或不至爲所牽掣現在攻勦情
形若何著飭李鶴章等一面迅圖克復常州一面

嚴備丹陽之賊續行內犯毋稍疏虞

十四日
甲寅

上諭內閣曰浙江嘉興杭州兩府先後克復該府屬
地方久爲賊踞小民慘遭荼毒蕩析離居田土荒
蕪殊堪憫惻所有杭州嘉興兩府屬新復各州縣
地方著加恩將同治二年三年分應徵錢漕悉行
蠲免其未經克復之湖州一府暨石門等縣並著

於克復後查照杭嘉兩府蠲免章程一律辦理

十六日

丙辰

上命議政王軍機大臣傳諭官文曾國藩嚴樹森曰
現在蘇杭均已克復金陵圍攻日緊前閱李鴻章
奏內有三四月可以克復之冒當此功在垂成各
路統兵將帥及各該督撫等允宜同心勦力以期
共濟自陝省漢中之賊出竄甯陝商州一路節據

張集馨等奏報漢南賊欲回救金陵約於鄂省襄陽老河口等處會齊是鄂省軍情極爲喫緊所派成大吉等水陸各軍分駐襄鄖並當陽各處是否均已到防何以戰守情形經月並無奏報當此金陵垂克之時若令賊得肆其狡謀於襄樊一帶會齊順流而下將圍攻金陵大軍必致爲所牽動官文嚴樹森如不能將此賊嚴密防剿致誤大局自

問當得何罪鄂省各路官軍深恐事權不一官文
嚴樹森二人內當商定一人出省督辦防剿毋得
安坐省垣一任賊匪紛竄俟有勝仗一奏塞責以
爲了事並著於商定出省後一面迅速奏聞曾國
藩能否親往金陵督辦攻剿現在襄樊喫緊該處
爲金陵及皖省上游亟應豫爲防範該督前奏楊
岳斌統帶師船嚴防江面不能調往他處此時江

面上游喫緊著卽於楊岳斌彭玉麟二人內酌留
一人防江一人溯流而上以資策應如鄂省派出
成大吉等軍無所統率楊岳斌等無論何人前往
均可將鄂省各路陸軍併歸統帶調遣其襄樊一
帶竄賊官文嚴樹森必當勦除淨盡不准以鄰爲
壑曾國藩爲國重臣身繫東南全局安危官文等
向來辦理軍務尙能不分畛域均屬有功之人值

此大功垂成尤應始終罔懈同濟艱難若令垂成之功又有中變事屬何人貽誤必將該督撫重治其罪

十七日丁巳李鴻章奏冒常州丹陽竄擾江陰常

熟股匪經我軍力戰解圍該逆仍踞江陰東南歸路已斷賊數雖衆屯踞楊庫華市周莊沙山五六十里閒面面有我軍屯紮常州丹陽踞逆

屢由江陰青山等處衝入接應均被我軍勦回
賊漸危蹙二月二十四日臣添調劉士奇等帶
隊二千人會合郭松林循福山鹿苑江岸偪勦
臣於三月初二日由蘇州馳赴長涇親督各軍
會戰初六日臣派令各軍分路進擣華市行抵
沙山腳距華市三里賊衆列隊山阿倚營拒敵
劉士奇等帶隊抄入營後槍礮環施賊陣稍亂

鄭國魁等乘勢督隊撲營拔椿踰濠一擁而進
賊衆敗潰緣山亂竄臣飭各軍分道猛進追殺
四十餘里賊屍枕藉白華市至樹山賊壘百餘
處一律埽平日已嚮晦遂令李鶴章等繞至江
陰會合略國忠等由北路攔頭截剿劉士奇等
帶隊暫駐周莊邀擊楊庫竄路臣督鄭國魁等
軍馳往青陽會合楊鼎勳等由南路從後兜剿

是夜五鼓楊厓踞賊惶遽南奔欲併歸雲亭一
路劉士奇等設伏於雞籠山下太平橋賊整隊
來衝我軍槍箭齊施賊衆駭奔乘機蹙之落水
死者無數先是初四日夜僞英王叔及忠逆之
子兩股因東路援軍大至率衆由華市花山馳
回三河口乘夜搭造浮橋三道憑河築壘以護
初五日張樹聲等以小隊誘敵逆衆二三萬由

秦望山包裹而上張樹聲等力戰卻之擒斬六百餘名是夜又在三河口添搭浮橋二道初六日華市周莊楊庫敗賊併聚雲亭花山一帶北抵南牖南至越城橋圖竄丹常李鶴章夜抵江陰飛令郭松林等分路會剿初七日辰刻郭松林李昭慶列隊南牖前面駱國忠由花山抄擊該逆見衆軍堵在歸路拌死來撲黃兆來等迎

戰將賊衝作兩段前隊萬餘人向越城橋西奔
後隊二萬餘人由花山奔竄郭松林躍馬橫出
直撲三河口賊營賊卽棄壘渡河浮橋五道擠
斷其四人馬落水堆積數丈河爲不流楊鼎勳
等復由閒道截住前後夾擊其未過河之賊或
陷入圩中或棄械乞降數以萬計其已過河之
賊張樹聲等分追截殺橫屍遍野餘衆星散日

捕收隊統計各軍俘獲近二萬人沿途淹斃殺斃無數其逸回常州丹陽者約僅二三千人訊據擒賊供稱僞王侯及大頭目鮮得脫者查此股逆衆經諸軍兩日痛勦擒馘解散實有二三萬衆緣歸路先斷子藥俱盡該逆遂不耐戰大半徒手受縛所擄百姓米糧衣物概行拋棄當卽散給窮民現在沿江腹地一律肅清所有守

城殺賊尤爲出力各員謹先行開列懇請從優
獎勵其餘出力及傷亡員弁兵勇可否彙案獎
卹之處出自

恩施奏入

上命議政王軍機大臣傳諭曾國藩李鴻章曰常州
丹陽股匪屯踞江陰李鴻章斷其歸路該逆屢由
江陰青山等處衝入接應均經擊回李鴻章復馳

赴長涇督戰將華市周莊楊庫踞賊擊敗餘匪竄聚雲亭花山欲由三河口回竄丹常復經官軍分路剿除沿江腹地一律肅清辦理甚爲妥速此時常郡賊援已絕李鴻章正當移得勝之師會攻常州迅拔堅城以斷金陵外應仍一面分軍規復金壇毋稍延緩鮑超自克句容後進攻丹陽曾否得手著曾國藩檄飭該提督並飭知馮子材等軍會

同夾攻迅將該城克復以期肅清金陵東路金陵
賊勢當更窮蹙值此功在垂成曾國藩當飭各營
將士嚴密防範以杜該逆出竄毋稍大意程學啟
槍子取出後續據李鴻章奏漸有轉機此次報內
未經提及是否痊愈著李鴻章遇便奏聞道員張
樹聲此次由常州分兵堵紮要口捻斬甚多著交
軍機處存記候旨簡用

上諭內閣曰常州丹陽竄匪屯踞楊庫華市周莊沙
山等處李鴻章督軍分路進攻先將華市至樹山
賊壘百餘處一律掃除其楊庫踞匪復經李鴻章
親督各軍分投兜剿該逆惶遽南奔與華市周莊
敗賊併歸雲亭一路欲由三河口浮橋回竄官軍
連日圍剿賊衆棄壘渡河我軍斷其浮橋四道旋
將三河口賊營攻拔各軍斬獲近二萬人餘匪分

向常州丹陽竄逸沿江腹地肅清勦辦甚爲奮勉
著李鴻章迅飭諸軍將常州金壇郡縣次第攻拔
以靖疆圉此次尤爲出力之記名總兵楊鼎勳著
遇有總兵缺出儘先題奏署副將駱國忠著交軍
機處記名遇有總兵缺出請旨簡放並賞給正二
品封典總兵李正佩著賞給從一品封典參將賈
宏材歐載陽均著以副將儘先補用副將周河清

著賞給捷勇巴圖魯名號參將向順福著賞給強
勇巴圖魯名號易華元著賞給銳勇巴圖魯名號
四川補用都司覃洪陞著免補遊擊以參將仍留
原省補用遊擊管松林著以參將補用並賞加副
將銜遊擊銜黃兆來著以遊擊儘先補用並賞加
副將銜千總鄭國謨著以守備補用並賞加遊擊
銜安徽補用知府魏承樾著免補本班以道員仍

留原省補用從九品朱開泰著免選本班以縣丞
儘先選用並賞戴花翎其餘出力及傷亡員弁兵
勇著李鴻章查明彙案奏請獎卹

十八日
戊午富明阿奏言據總兵詹啟綸稟稱揚

防南渡兵勇由丹陽北門外七里廟張公渡瓜
渚一帶分紮二十餘營三月初九日僞英王叔
僞廣王僞順王忠逆之子帶賊數萬一由常州

運河一由江陰孟河大缺口蠶擁而來詹啟綸
督軍迎擊並商令侍衛訥依楞阿等分兩翼夾
攻賊衆潰退我軍追殺二十餘里擒斬三百餘
名是夜賊復率衆二萬餘人由黃村一帶分股
來撲另設抄撲鎮軍營壘詹啟綸等分道迎擊
槍礮環施賊仍恃衆反撲我軍銳氣百倍鏖戰
正酣適遊擊吳世英等由北路追勦而至逆衆

狂奔自相踐踏各軍會合追殺斃匪六七百名
生擒永天福張大志及賊黨多名其東南一路
援賊亦經鎮營總兵張文德等擊退斬擒甚多
惟援賊尙散布於丹陽東南北附近一帶誠恐
繞截我軍後路且南岸地勢遼闊兵力尙覺不
敷經詹啟綸稟請添兵渡江助剿等情查此股
逆匪被剿窮蹙勢必拼死衝撲以爲困獸之鬪

現派營總富陞等統帶馬隊一百五十名副將
廖鴻清參將周萬福各帶勇五百名於十一日
拔隊南渡並飭詹啟綸聯絡鎮軍穩慎進攻不
可稍涉大意

同日馮子材魁玉奏冒鎮揚官軍定計由馬陵
新豐會攻丹陽總兵詹啟綸統揚營馬步滾營
而進遊擊鄭啟貴等帶勇駐紮七里廟各營由

諫壁越河至新豐一帶節節聯絡爲東北一路
總兵張文德統鎮營馬步由馬陵十里牌三橋
村步步爲營前敵直抵湖頭街爲西南一路三
月初六七等日先後會薄丹城屯甸寶堰之賊
卽乘夜焚巢而遁僞英王叔陳逆知官兵大至
自江陰常州率衆五六萬回援屬集東北分犯
官軍營盤初九日詹啟綸率副將李友才等督

隊迎擊陣斬黃衣賊目及餘賊數十名初十日
詹啟綸帶隊馳抵東路扼紮令副將王昌裕等
左右撓抄該逆恃衆抗拒官軍三面盪擊斃賊
無算生擒百餘名賊遁走錢家廟一帶其竄撲
西南之賊見官軍直逼城下悉力來爭初十日
分股抄撲西門各營張文德率副將周伯雲等
更番迎勦賊再卻再進官軍馳驟衝突殲賊甚

多該逆復糾黨萬餘蠭擁而來張文德令各營嚴陣以待飭副將林從太等從後抄擊賊屍枕藉都司田國珍歐得亮各受重傷負創力戰殪前鋒悍賊十餘名官軍乘勢追剿二十餘里斬馘百餘級餘衆竄伏附近村莊查丹陽一城近與常州聯絡遠爲金陵聲援賊以全力死守而陳逆卽四眼狗陳玉城之叔狡悍爲諸賊冠臣

等已嚴飭詹啟綸張文德等慎重圖維相機堵
剿務將援逆設法掃除規復方有把握現計揚
鎮兩營馬步約共一萬五六千名昨准富明阿
來咨添撥兵勇一千一百名南來助剿當飭前
往新豐由詹啟綸酌量調派並與鮑超一軍互
相策應以期迅掃逆氛均奏入

上命議政王軍機大臣傳諭富明阿馮子材魁玉曰

丹陽一城與常州金陵互爲犄角現在詹啟綸張
文德已直薄城下揚鎮兩營之兵共有一萬五六
千名富明阿又添派富陞等馬步兵勇一千一百
餘名兵力已不爲少著卽督率詹啟綸等實力進
攻迅拔堅城盡殲醜類鮑超自克句容後曾否會
攻丹陽並著飭令詹啟綸等與鮑超一軍聯絡一
氣勿任窮寇復竄他處致辦理又形棘手陳逆兇

狡爲諸酋冠此時未受大創仍在附近屯踞勢必
拌死力鬪圖解城圍在事各員務令嚴密防維相
機痛勦無爲所乘

十九日己未富明阿奏言沿江南岸賊衆紛竄段

山迤西水師總兵吳全美派參將馮耀祖等率
礮船依岸進攻槍礮齊發斃賊多名賊復聚大
股由蘆頭沙段山一帶出竄副將林宜華等迎

頭夾擊斃賊百餘名該逆分股竄至合興街擄掠亦經參將鄭起鵬等擊遁吳全美親督師船沿江察看節節戒備三月初十日行抵鎮海菴賊衆大股由小河包港直上蔓延劉巷一帶其鎮海菴對岸之老店頭地方亦有馬步賊數千屯聚吳全美揮令各船開礮迎擊逆衆憑隄抗拒吳全美復親督副將吳奇勛等衝上隄岸環

施洋槍斃匪甚衆賊仍拌命抗拒我軍分隊衝
擊遊擊石皓亦督礮船駛至三面奮擊賊衆潰
遁我軍追斬無算查此股殘賊數萬因人衆糧
絕趨重上下游爲擄糧謀生之計雖經師船勦
敗難保不鋌而走險且常州丹陽大軍偪緊無
可容身若不悉衆回撲勢必亂竄沿江覬覦太
平洲等處以冀苟延殘喘現經吳全美飭令林

宜華策應江而參將李德祿前赴紫氣常陰等
沙駐泊鄭起鵬巡防壽星等沙馮躍祖前往蘆
頭沙堵禦復令參將張登三於各沙要隘上下
梭巡聯絡聲勢臣惟有督飭各軍慎之又慎加
意嚴防惟探聞該逆有擄足糧食回犯丹陽各
軍後路會合丹城踞匪內外抄截之語已飭詹
啟綸等持重進取免墮賊謀

富明阿又奏言正在封摺間據總兵詹啟綸稟稱三月十一日營總富陞等帶領馬隊查看地勢途遇援賊五六百名蠡擁而至卽揮隊迎擊該逆亦用洋槍抗拒遊擊胡世英奮勇爭先官兵乘勢齊進槍箭並施賊衆敗竄我軍追殺一百餘名生擒三十餘名訊據賊供僞英王叔率黨五六萬散布錢家廟皮城牛港孟河大港沿

江一帶四出擄糧一經糧足卽會合丹陽城賊
夾攻官軍營盤並在各港口搶奪民船冀圖外
竄使官兵首尾不能相顧等語該逆節經被創
人衆乏食刻圖聚糧急鬪自在意中當飭詹啟
綸深溝高壘節節聯絡毋爲賊乘並隨時酌派
馬隊探蹤搜剿俾該逆無可擄掠檄飭吳全美
親督師船上下梭巡嚴加堵遏奏入

上命議政王軍機大臣傳諭富明阿馮子材魁玉曰
逆匪因人衆糧絕趨重上下游擄糧謀生雖經吳
全美等師船擊敗難保不悉數回撲沿江紛竄著
富明阿仍飭吳全美督帶師船策應江面並於各
沙要隘上下梭巡以期聯絡聲勢北岸一帶尤須
加意嚴防前據富明阿奏詹啟綸等業已直薄丹
陽城下此次截剿援賊頗有斬擒卽著富明阿馮

子材魁玉仍遵前旨督令詹啟綸等並添派之富
陞等軍與鮑超聯絡進剿迅拔堅城盡殲醜類僞
英王叔陳逆悉衆來援據賊匪供稱逆衆五六萬
散布錢家廟等處打館擄糧欲會合城賊夾攻官
軍營盤又在港口搶奪民船冀圖外竄各情逆謀
兇狡著富明阿馮子材等嚴飭在事員弁嚴密防
維不得稍涉大意

同日河南巡撫張之萬奏冒僧格林沁由亳州
督師前來臣卽於三月初三日馳赴許州接見
會商進剿機宜僧格林沁於初七日進紮洛陽
防賊北竄臣折回汝州嚴飭張曜葛承霖宋慶
善慶色爾固善等軍緊躡兜剿查張總愚捻股
由黑峪陸續西竄二十一日張曜等追至黑峪
該匪列隊抗拒我軍奮勇衝擊匪衆竄往盧氏

境內樂川廟子街三川等處張曜令保英李世
玉各軍扼紮黑峪防賊回竄自率張士元尹嘉
賓步隊與宋慶等軍繞赴盧氏斷張總愚會合
髮逆之路初髮逆被張總愚勾合竄抵豫疆臣
豫飭張曜於所部抽出精壯分布要隘嚴防旋
探髮逆大股麤聚鎮平所屬之馬山口七里坪
豹子灘一帶單體晉等帶馬步兵勇截殺陣斬

馬賊多名乘勢追壓該逆向西南奔竄二月二十八九等日圍攻內鄉縣城城上守禦嚴密三月初一日匪衆由東北復撲城關東南一帶又有大股踵至合而爲一我軍開放大礮斃匪多名該匪退至山岡上下屯聚經參將周兆常等率領團勇縋城而下奮勇進攻該逆猝不及防死者無算盡棄所攜糧食衣物一向西竄一向

南竄城圍立解其陳大禧擒股時由鄧州之孟樓厚坡等處向內鄉奔竄冀與髮逆合股臣於二月二十五日函至蘇克金傅振邦等移紮南陽該副都統等當派春山桂錫楨等帶領馬隊六百餘人前赴鄧州防剿陳逆震懾聲威不敢與髮逆合股同行仍由舊路折回距內鄉城六十五里之韋家集復由帥家岡回竄浙川之李

官橋襄陽之老河口而內鄉解圍後髮逆竄往
內鄉以西之下瓦亭其後股已由龍駒寨竄至
商南之竹林關邊馬擾及商境之穆家峒是豫
省宛洛一帶寇氛四集官兵備多力分臣愚以
爲目前軍務當以剿滅張總愚爲要領該逆尙
踞樂川其地西出朱陽關則犯商雒南走大坪
頭則達鄧內臣已飭張曜宋慶等軍裹糧疾走

繞山賊前由盧境之三川進紮桃灣扼其西竄
朱陽關之路並調善慶色爾固善統帶馬隊由
長水重陽溝會合桃灣之師迅圖剿洗奏入

上命議政王軍機大臣傳諭僧格林沁官文嚴樹森
張之萬曰目前軍務以先剿張總愚爲要領張之
萬已飭張曜宋慶等軍繞出其前扼紮桃灣以防
西竄朱陽關之路並令善慶等馬隊會合剿洗著

卽嚴飭該將領等捲甲疾趨滅此朝食無再任其蔓延張曜追勦張總愚擒斬甚少盡成尾追之勢若再不得力卽由僧格林沁張之萬嚴叅懲辦陳大喜回竄浙川之李官橋襄陽之老河口髮逆竄商南之竹林關等處是襄鄖二府均屬喫重官文等一月無報實屬不知緩急究竟所派之梁作楫等軍能否得力應否添調新軍均須認真布置該

匪本爲圖救金陵而來若由隨棗黃麻直趨英霍
或由各路順流而下則曾國藩不能不力爭上游
恐於金陵垂成之局又生枝節襄鄖一帶地勢寬
廣官文所派防邊各將無所統率必將貽誤事機
官文嚴樹森當懍遵前旨卽日商定一人出省督
師一人留辦防務不准稍有遷延並飛咨曾國藩
移調楊岳斌等水師於襄樊一帶督同陸師夾剿

僧格林沁現已進紮洛陽該親王威望素著各逆自必望風逃避惟當通籌大局移緩就急妥籌調度現在陳大禧及漢中竄逆均聚內鄉其北有僧格林沁駐紮洛陽之師足資捍禦其東係髮捻圖援金陵之路著僧格林沁迅飭蘇克金等軍由南陽進兵剿洗並著張之萬派撥重兵扼其東竄免致由豫入皖掣動金陵大局其分竄老河口捻股

著官文等嚴密截剿各路竄匪如由何路掣動大局惟何省督撫是問其應扼要設防之處並著僧格林沁官文等悉心調派彼此知照毋誤事機

欽定勦平粵匪方略卷三百六十八 甲子年

三月二十日

庚申

左宗棠奏言杭州餘杭兩城經

官軍於二月二十四日同時攻克業將大概情

形先行馳奏二月二十一日蔣益澧派提督高

連陞等率各營攻清泰門外觀音堂賊壘派副

將周廷瑞等率各營攻古蕩賊壘派洋將德克

碑用大礮轟攻鳳山門城垣蔣益澧分親兵五

哨助之自率四哨爲諸路策應卯刻高連陞等
齊抵觀音堂督隊猛進立破賊壘二座賊卡數
處聽逆陳炳汶率悍黨萬餘來援蔣益澧與總
兵劉清亮等馳至將賊擊退時德克碑在饅頭
山開放大礮已將鳳山門城垛轟塌三丈餘蔣
益澧調轉大隊搶上高連陞等緊偪城根我軍
奮勇先登城賊拌死抗拒高連陞王聯芳均受

槍傷猶裹創力戰逾時始收隊還其周廷瑞等
進攻古蕩賊壘因賊營隔水環攻未下乃分兵
先攻葛嶺之賊忽悍賊千餘由錢塘門外來援
都司賀國輝等擊敗之周廷瑞等乘勢將葛嶺
賊壘兩座攻克共斃悍賊七百餘名遊擊徐文
秀等又連破武林門外二壘並古蕩二壘追至
武林門外十里街始收隊而還二十三日蔣益

遭復派水陸各營分攻武林錢塘鳳山望江清
泰各門自率親兵往武林門督戰徐文秀等督
隊疾至十里街躍進內濠奮勇環攻首逆陳炳
汶率悍黨萬餘來援劉清亮等各營分投堵擊
賊勢稍卻時周廷瑞等奮攻賊壘勢已垂破城
中又出援賊數千蔣益澧飭都司謝茂勝等率
洋槍隊緊逼城門轟擊陳逆拌死相持鏖戰三

時斃賊極多而官軍傷亡者已四百餘名攻至酉刻收隊是日賊壘雖未攻拔然悍賊已多傷亡聽逆是夜四鼓潛啟武林門逃竄蔣益澧急派徐文秀等軍分兩大隊由武林錢塘等門衝殺而入蔣益澧率親兵繼之將匿賊悉行駢戮賊屍枕藉高連陞等及德克碑亦各率所部同時由鳳山清波清泰慶春等門梯城而入四路

搜殺斃賊數千名生擒千餘名拔出難民無數
卽於二十四日卯刻將杭州省城攻克蔣益漕
一面分軍移紮各門一面抽派馬隊跟追沿途
又斃賊數百名其餘杭踞逆壘經官軍奮擊攻
克倉前李家塘等處賊壘斃賊近千名二十日
夜臣飭各軍環攻城壘賊勢驚亂至曉收隊已
刻復出康國器令遊擊林本等爲前隊同知康

熊飛等繼之倉前援賊經參將吳光亮等衝擊斃賊不少乘勢將附近蔣元壩賊卡焚燬僞賴王劉逆率悍黨來援官軍立將劉逆轟斃並斬黃衣賊目多名賊敗走時倉前援賊由橫渡橋斜抄而出遊擊蔡盛恩中槍落河身死參將古捷芳亦力竭陣亡勢甚危迫遊擊林珠等率所部突圍而入奮力衝殺賊始奔潰官軍又斃賊

數百名其西門南門所出之賊復被截殺無算
賊勢窮蹙將城中輜重婦女悉搬出城外壘中
臣知該逆將遁當飭各營輪流猛攻並令礮船
駛入餘城南湖以備轟擊城賊益怖二十四日
汪逆海洋率黨由東門向瓶窰一路竄走當將
餘杭縣城收復已革總兵羅大春等各營分路
追殺斃賊甚多追至瓶窰而杭城之賊亦已竄

至與瓶窰踞逆憑壘抗拒臣得報飛飭各營躡
蹤緊追自率親兵繼進賊連夜竄走臣馳抵瓶
窰卽飭各營疾追抵安溪關該處悍賊半伏壘
中半匿林內妄冀分股包抄羅大春等先將伏
賊搜剿殆盡乘勢攻壘賊匪紛紛潰竄當將安
溪關要隘攻克餘賊向武康德清等處敗走臣
飭各營緊追武康之賊飭道員楊昌濬率親兵

暫駐瓶窰爲各路策應蔣益澧分督各營速攻
德清石門之賊以期規復湖州斷賊回竄之路
竊維杭州爲全浙根本餘杭又爲杭州西北屏
蔽逆首陳炳汶汪海洋負隅死守大軍數月以
來攻勦殆無虛日茲幸兩城同克浙西大局漸
可次第肅清現據探報逆首黃汶金李遠繼等
麇聚湖州侍逆李侍賢及各悍賊又復竄入是

湖州爲諸逆淵藪最爲喫重臣自當殫竭心力
慎以圖之賊在湖境則圍攻賊出湖境則追勦
務將巨寇聚殲免致流毒完善地方此次克復
兩城在事文武不無微勞足錄浙江布政使蔣
益澧等先行懇

恩分別優加獎敘其餘出力員弁兵勇可否容臣查
明從優保獎出自

恩施陣亡參將古捷芳等均請

飭部從優議卹臣拜摺後卽入省辦理善後事宜

左宗棠又奏言杭州踞逆僞北王錢貴沱前曾遣人納款獻城嗣因人多謀泄被汪逆知覺將內應之人概行殺害錢貴沱卽深自隱飾不敢輕舉自蔣益澧攻入杭城搜剿逆匪錢貴沱卽率其黨千餘跪伏道旁泣求免死據蔣益澧稟

報前來臣以錢貴在雖劫於兇威未能立功贖罪而事前通款屬實尙可貸其一死已飭令分別遣散挑留奏入

上命議政王軍機大臣傳諭左宗棠曰據奏攻克杭州餘杭兩城詳細情形蔣益澧前已賞穿黃馬褂現復賞給雲騎尉世職提督高連陞亦賞穿黃馬褂以示優獎左宗棠當飭令蔣益澧等益加奮勉

集賢堂之西卷三十一
立功自效杭州餘杭之賊併竄瓶窰經左宗棠督
兵攻克該逆踞壘並將安溪關要隘攻奪敗匪分
趨德清武康該督派兵追躡武康之賊而令蔣益
澧督兵速攻石門德清以期進拔湖州郡城著卽
嚴督將士奮勇進攻湖州爲各路賊匪關聚之區
黨與尙多必思出竄江西不肯坐困孤城左宗棠
當會同蘇皖各軍分布要隘杜賊出走之路以期

聚而殲旃降日錢貴芒旣經事前通款投誠尙可
貸其一死餘黨卽著分別遣散挑留

上諭內閣曰杭州踞逆經蔣益澧督率各軍分路環
攻二月二十一等日疊破城外賊壘德克碑在饒
頭山開放大礮轟塌鳳山門城垛三丈餘該逆屢
率悍黨抵死抗拒官軍奮勇攻擊殲斃甚多賊勢
愈蹙二十三日夜該逆啟門潛遁官軍梯城攻入

搜殺餘匪數千名生擒千餘名卽於二十四日將
杭州省城收復餘杭踞逆經左宗棠督飭各軍晝
夜環擊疊有斬擒賊衆洵懼二十四日該逆率黨
由東門向瓶窰一路竄走當將縣城收復左宗棠
馳抵瓶窰派兵追殺立將安溪關賊壘攻克餘賊
向德清武康等處敗走勦辦甚屬得手仍著左宗
棠督飭各軍乘勝進攻湖州郡縣迅掃逆氛廓清

全浙浙江布政使蔣益澧奮勇勦賊克拔堅城前
經降旨賞穿黃馬褂著再加恩賞給雲騎尉世職
提督高連陞著賞穿黃馬褂權授浙江省總兵德
克碑帶兵助勦尤爲出力著賞給頭等功牌並賞
銀一萬兩以示嘉獎道員楊昌濬著賞加按察使
銜康國器著遇有福建道員缺出請旨簡放並賞
加按察使銜總兵王月亮劉榮合均著賞加提督

銜並賞給三代從一品封典劉清亮著交軍機處
記名遇有提督缺出請旨簡放楊政謨劉連陞均
著賞加提督銜副將周廷瑞劉樹元王聯芳均著
交軍機處記名遇有總兵缺出請旨簡放彭大光
著交軍機處記名遇有閩浙水師總兵缺出請旨
簡放簡桂林著交軍機處記名遇有閩浙總兵缺
出請旨簡放並賞給傑勇巴圖魯名號己革總兵

羅大春著開復原官遇有閩浙總兵缺出請旨簡放總兵楊和貴著賞給揚勇巴圖魯名號副將曹魁甲著賞加總兵銜並賞給兩代二品封典遊擊徐文秀著免補遊擊以副將仍留浙江遇缺卽補並賞加總兵銜參將李運榮著以副將補用並賞加總兵銜副將羅啟勇著賞加總兵銜並賞給確勇巴圖魯名號參將馬德順著以副將仍留浙江

補用並賞加總兵銜吳光亮著以副將仍歸江西
補用並賞加總兵銜四川補用副將劉清望著以
副將改留浙江補用並賞給勁勇巴圖魯名號遊
擊余朝貴著以副將仍留浙江補用林珠林本均
著以參將仍歸江西補用並賞加副將銜翁桂秋
著以參將補用並賞加副將銜席得元等均著以
參將仍留浙江補用並賞加副將銜都司王東林

著以遊擊仍留浙江儘先補用並賞加副將銜賀
國輝等均著以遊擊留於浙江補用並賞加副將
銜謝茂勝等均著以遊擊留於浙江補用胡榮著
以遊擊補用守備姜子豹著以都司補用千總李
國棟著以守備補用並賞加都司銜道員朱明亮
著賞加按察使銜同知魏光邴等均著免補本班
以知府仍留浙江遇缺卽補補用同知直隸州知

州吳作梁著免補本班以知府仍歸湖南遇缺卽補並賞給該員祖父母父母正四品封典同知康熊飛著免選本班以知府留於浙江補用遊擊高有志著以副將儘先補用參將丁應龍等均著賞加副將銜陣亡之參將古捷芳遊擊蔡盛恩均著交部從優議卹其餘出力陣亡各員并著左宗棠查明分別奏請獎卹

二十一日辛酉會國藩奏言金陵城賊常放婦女

幼孩出城以爲節食之計洪會忠逆堅忍異常
前此兩次掘穿地道及雲梯猛攻均未得手鮑
超一軍於三月初六日與賊戰於句容城下賊
衆大敗次日克復縣城擒斬僞漢王項大英僞
列王方城棕從此金陵城外賊壘悉爲我有當
不能以大股衝出貽患他方惟營中餉需奇絀

米糧昂貴深慮軍心不固另生波折杭城克復
後賊由德清併入湖州該處股數日多恐仍將
覓食上竄臣與左宗棠之師在徽浙之交節節
布置以防羣賊再犯江西其前此竄入建昌之
賊一趨南豐一趨新城並分股擾及廣昌界席
寶田劉勝祥韓進春等均在南豐二月二十三
四等日疊獲勝仗斬僞天將譚幅於陣其精健

營一軍亦由貴溪馳赴南豐新城若能克復該縣使前股不能立定巢穴則後股亦難跟踪上竄庶勦辦易於得手

同日沈葆楨奏冒髮逆窺伺建郡經官軍痛勦後河西賊館旣破宜黃之路亦隔僞沛王遂於二月十九日潛竄南豐縣城僞天將譚幅以悍黨數萬人築壘於城之西北爲固守計僞王宗

一股於新城各鄉肆行擄掠僞天將林正揚一
股犯廣昌界二十二日席寶田劉勝祥率隊進
剿紮營於百花亭距南豐城二十里韓進春營
於其右之謝坊二十三日韓進春由右路進踏
毀包坊賊館截殺二百餘名近偪城根劉勝祥
破其左路山卡與精毅營擒斬各以百計斃逆
目金添幅一名該逆退伏城中二十四日席寶

田等分路進攻沛逆譚逆於去城十里之羅蒲
洲迎敵猛撲祥字營數次我軍屹立不動遊擊
張集雲等直擣賊堅遊擊陳宜道等分隊旁襲
環攻移時都司朱勝祥等以火彈火箭奮擊賊
衆大亂沛逆踉蹌入城譚逆負創而西當將北
門逆壘四座平毀我軍乘勝截殺逆衆望風駭
遁千總會佐朝陣斬僞天將譚幅一名河東之

賊由上游淺灘渡河東門亦出賊數千馳援均
爲總兵邊曉堂等擊退沛逆復自北門出大股
回撲我軍合隊蹙之該逆敗匿城中統計殺賊
三千餘名溺斃千名生擒七百餘名二十五日
韓進春進紮離城五里之樟樹下以牽制城賊
三月初一日席寶田等會隊攻城槍礮環施該
逆堅匿不出臣以皖浙防兵旣集調回精捷營

進新城繼果營進南豐與席寶田等合力夾剿
以期迅速會織水師統領臬司劉于潯等均派
飛划上駛護南贛鎮總兵普承忠亦抽隊前進
計日內可陸續到齊會同攻剿內閣侍讀銜前
翰林院編修吳嘉賓因賊攻三都督團迎剿力
竭遇害殊堪憫惻可否仰懇

天恩飭部加等議卹准於殉難地方建立祠宇以慰

忠魂陣亡之擬保把總黃永全袁正泰並懇
飭部照把總例從優議卹

同日總理各國事務衙門奏冒江浙軍務日有
起色蘇杭疊報克復惟金陵城大而堅悍賊屬
聚聞曾國藩等圍城之軍不下六七萬衆將士
極爲用命而餉需短絀不能全數關支現當攻
城喫緊之時功在垂成亟應竭力共圖以期迅

速藏事茲臣衙門查有上年奏請購買輪船經費銀三十七萬五千兩又江海關舊存零稅銀一十一萬四千六十四兩六錢又輪船餘款銀四千八百十六兩三錢四分洋錢一萬六千九十七圓現在金陵攻勦喫緊軍餉尤關緊要自應移緩就急先顧此項餉需所有前項銀兩可否全數撥解曾國藩軍營恭候

命下欽遵辦理均奏入

上命議政王軍機大臣傳諭曾國藩李鴻章沈葆楨
曰沈葆楨所奏南豐新城等處勦賊情形曾國藩
亦經陳及卽著該督撫督飭席寶田等軍趕緊會
合聚殲羣醜速將南豐縣克復使賊股不能上竄
其徽浙之交曾國藩與左宗棠所部節節布置並
著嚴密堵扼毋使羣賊再行越犯江境總超一軍

克復句容後究作如何調度是否飭令進攻丹陽
金陵一有可乘之機曾國藩自當督令曾國荃激
勵諸軍迅圖攻拔揜渠埽穴以成全功總理各國
事務衙門奏金陵功在垂成而餉需短絀竭力籌
濟以期迅速歲事著卽照所請將該衙門上年奏
撥輪船經費等項銀五十萬有奇全數撥歸曾國
藩軍營充餉曾國藩得此協餉尤當飭令曾國荃

奮力圖功穩慎進取激勵將士迅奏膚公以副厚望內閣侍讀銜前翰林院編修吳嘉賓於賊擾南豐縣之三都地方督團力戰力竭被害著卽交部加等議卹並准於殉難地方建立專祠以慰忠魂擬保把總黃永全袁正泰剿賊陣亡均著照把總例從優議卹

同日吳棠奏言臣前因賊竄福山江防喫重擬

將黃開榜一軍入江協剿茲疊據富明阿及沿江州縣文報南岸官軍將賊擊退江陰福山一帶已無賊蹤等語是江防情形已鬆黃開榜所帶水師本駐高寶內湖西卽天六淞甯等處防守亦關緊要且江防旣鬆又派大隊南下恐沿江居民轉多驚擾臣現飭黃開榜暫緩赴通一面函商富明阿如須添兵協剿卽抽撥水陸各

軍兼程赴援不敢稍有遲誤奏入報

聞

二十二日壬戌馮子材魁玉奏冒丹陽西門緊靠

練湖賊就湖頭村扼要築壘三月初八九等日

鎮防各營進紮西門一帶更番轟擊總兵張文

德復派軍功劉洸如等紮營湖埂以牽賊勢十

一日賊大股萬餘由湖隄出撲另股逆援從南

路衝突西門營盤張文德飭令各營分列堵擊
並派遊擊杜日新管帶礮隊協守湖埂營卡該
逆悉銳下壓槍礮不絕又於湖內排列礮船水
陸轟撲甚急劉洸如等多方扼守斃逆無算賊
復分張兩翼衝入南路之賊亦合隊而來張文
德親率所部縱橫兜剿馬隊四面蹴之賊衆潰
逃我軍連毀礮臺二座跟蹤追殺共斃賊二千

餘名十二日城逆千餘復從西門出犯亦經官兵擊退臣等聞報飛飭守備劉連陞管帶礮划駛入練湖堵賊運道城逆乘夜開掘西城隄埂俾湖水外洩圖覓竄路張文德知賊勢已蹙於十四日派各營圍撲湖頭村轟擊多時城逆糾黨來援張文德揮軍分紮湖埂攔頭截剿副將楊青山帶隊猛攻逆壘肉薄先登賊衆驚竄我

軍斬馘無數湖埂賊援望風逃匿奪獲洋礮器械船隻甚多另設馬步悍賊數千人竄過黃墟村總兵詹啟綸派參將林成興等迎擊賊衆驚竄官軍乘勝掩殺追過大缺口地方逆黨數萬又自禹王廟至黃墟村一帶蠡屯蟻聚意在築壘負嵎層啟綸親率副將李有才等馳抵長灣岡三路分抄往來衝殺賊勢不支望禹王廟一

路回遁臣等仍令詹啟綸督率北路各營相機堵擊並飭張文德激勵將士由西而南設法合圍力圖攻復奏入

上諭曰仍著督飭張文德等會合詹啟綸一軍相機攻勦力拔堅城不得稍有疏懈

馮子材魁玉又奏言欽奉

諭旨富明阿所奏收撫白兔降賊情形與馮子材所

奏攻取白兔各情不甚相符查白兔燕坡橋寶堰各賊壘均在西南一帶互相犄角臣等因其距鎮寫遠攻勦未便密飭楊青山設法招撫但得一處歸正其餘方可進攻嗣據燕坡橋頭目余經鳳李知春等密約乞降願率所部隨勦附近賊壘二月十六日楊青山等進攻白兔該逆憑巢抗拒官軍受傷一百餘名次日復以火器更

番轟擊賊勢始蹙又見燕坡橋反正萬難孤立
棄壘而逃除臨陣俘馘外大半併歸寶堰當將
賊營四座焚燬此係當時分別勦撫實在情形
如果白兔一鎮先經受降何必重勞兵力又何
必將該處營壘一律踏平至降衆輜重送往鎮
城一節緣余經鳳等雖已就撫仍在燕坡橋駐
紮因將家屬眷口先行送出安頓於磨盤山下

距鎮約十餘里並無輜重進城之事刁經明所稟各情卽係燕坡橋之誤該員係在南路甘棠橋防勦於西路軍事本非目擊自不免傳聞異辭相應繕晰具陳奏入報

聞

二十三日
癸亥徐宗幹奏旨皖南賊匪由江西玉

山廣豐德興樂平等縣分股四出掠食另股擾

及崇安相近之鉛山縣屬黃公橋等處經遊擊
劉朝太督同兵團截剿斃匪多名該逆旋由鉛
山竄往弋陽瀘溪金谿等縣其前隊已入江西
撫建兩屬界內江省有重兵迎擊恐其被剿窮
蹙四路奔突亟須備豫不虞茲飭已革參將蔡
潤澤等管帶兵勇在浦城縣二渡關等處分布
嚴防劉朝太督率兵勇於崇安縣岑陽分水等

關扼守總兵袁良等軍駐紮建陽縣居中策應
道員陳維漢由延平至邵武會同佟慶等帶領
兵勇前赴光澤邵武等縣聯絡團防分守關隘
總兵趙漣帶兵前往汀屬邊界扼要堵截兼杜
土匪勾引復於省標各營挑選精兵親督操演
以備調遣查閩境建邵汀等府毗連江西各邑
袤延千餘里處處可通惟有分飭帶兵各員視

集賢堂
賊所向擇要堵禦何處有警卽飛速應援並於
附近地方激勸鄉團協同防守設或賊蹤竄越
臣卽帶兵出省督飭諸軍相機防剿惟督臣一
時未能凱旋副都統蘇克金亦未到任新任將
軍英桂計已出京伏乞

飭下該將軍迅速來閩俾臣得以專顧邊防奏入
上命議政王軍機大臣傳諭英桂左宗棠徐宗幹曰

皖南賊匪由江西玉山等縣分股四出掠食擾及
崇安相近之黃公橋等處經遊擊劉朝太等督團
截剿小有斬擒該逆旋由鉛山竄往弋陽等處前
據沈葆楨奏賊竄南豐新城已諭令該撫等嚴密
防剿該匪窮無復之必圖擾及鄰境新城與光澤
邵武等處均屬毗連徐宗幹現派已革參將蔡潤
澤等帶領兵勇前赴浦城等處扼防著卽督飭各

員勤加偵探遇賊卽擊並令地方文武聯絡紳團以收衆志成城之效如其賊蹤竄越邊防緊急著徐宗幹相機出省督勦浙省軍務漸平左宗棠身任兼圻自應力圖兼顧能否撥兵助防並著酌量辦理張運蘭屢經有旨飭催赴任著徐宗幹迅咨毛鴻賓催令帶勇起程英桂簡任福州將軍爲日已久現在因病請假著俟假滿卽行起程赴閩與

徐宗幹會商辦理

二十四日甲子安徽巡撫喬松年奏冒臣在安慶

接受撫篆卽日起程於三月初三日行抵臨淮
知僧格林沁已拔營赴豫深恐民心反側卽於
初五日赴懷遠蒙城一帶周歷巡查拊循彈壓
十四日仍回臨淮駐紮現令按察使英翰扼紮
雒河總管克蒙額總兵張得勝等分防要地總

期呼吸相通緩急可恃惟聞張總愚一股已與
髮逆相合恐其導賊來擾皖北潁宿之間楚豫
接壤之區皆須設防兵力不敷分布臣已飭帶

兵官添募勇一千名勤加訓練藉資調遣奏入

上諭曰所籌布置機宜均尙妥協卽著實心辦理以
副委任張總愚一股勾合髮逆恐其竄擾皖北該
撫當飭張得勝等將所部兵勇勤加訓練備豫不

虞毋稍鬆懈

二十五日乙丑富明阿奏旨據總兵詹啟綸稟報

三月十四日有馬步賊衆數千竄過黃墟村距
詹啟綸前敵營盤數里詹啟綸派參將林成興
等帶隊迎勦兩路包抄陣斬黃衣賊目餘賊驚
竄官軍追至大缺口復有賊黨數萬屯聚禹王
廟黃墟村一帶意圖築壘久踞詹啟綸飛傳各

營齊赴屯灣岡親督副將孫文友等三路抄襲
賊衆敗遁我軍旋亦收隊共殺賊數百名生擒
數十名十五日大股賊衆於西瓜山下偷築營
壘四座爲啟綸卽親督馬步馳往攻取該逆糾
衆譟擁前來遊擊胡世英等直搗中堅孫文友
等進攻南路副將刁經明進攻北路侍衛訥依
楞阿等帶馬隊左右包抄該逆列陣十餘里亦

分三股抗拒胡世英首先陷陣南北兩路並進
槍礮夾擊斃匪多名請依楞阿等從旁抄擊賊
衆敗潰我軍直抵山下賊壘詎該逆拌死抗拒
各營傷亡甚多且戰且退賊衆尾追里許詹啟
綸飛調劈山礮隊伏於路側出賊不意排列轟
擊斃賊無算胡世英等奮力衝壓詹啟綸揮令
各營繼進所向披靡賊始大潰自相踐踏我軍

追至西瓜山下立將賊壘四座踏平復追過禹
王廟掩殺二十餘里斬獲一千餘名臣因丹陽
賊勢屢敗恐其復竄江邊疊飭沿江各口加意
嚴防頃據水師總兵吳全美稟報十三日夜聞
偵知逆衆出竄當卽飛棹上駛瞭見恤養沙隄
岸經總兵魏麟彪等開礮堵遏因轉棹南下親
督副將張殿雄等率勇登岸抄近賊隊東面賊

亦分股來拒我軍奮勇衝殺斃賊甚衆該逆死
拒不退當派遊擊羅浩華撥隊由隄內包抄兩
路兜擊賊匪敗退我軍乘勢掩殺大股賊衆亦
經師船擊退十四日夜間賊復由江干紮壘圖
竄太平洲十五日馬步賊萬餘由劉港竄至姚
家橋江邊另股紛竄恤嫠沙武家橋郭家港一
帶當飭魏麟彪等嚴密堵截親督各船隨進隨

擊並飭張殿雄等槍上隄埂奮呼迎殺斃賊甚多賊恃劉港援逆屬至拌命鏖戰各軍乘勝衝擊參將賴進勝等奮力夾攻賊卽敗潰我軍三面兜擊賊向東南田中小路遁逸官軍追殺不少劉港援賊亦飛奔歸巢其竄往恤養沙武家橋等處之賊亦經魏麟彪等分投迎擊轟斃甚衆層啟綸以援賊復於黃墟村一帶築壘五座

意圖牽掣我軍並請添撥兵勇助剿等因查南岸逆衆因常州丹陽大軍進逼無路可歸四出狂竄雖經揚鎮各軍疊挫兇鋒而賊勢衆多時思逞志現又築壘相偪意圖立足江邊併力搶渡目前固處處宜防卽將來金陵常州克復設餘逆奔竄丹鎮首當其衝非厚集兵力不足制其死命臣現添調總兵楊心純帶勇五百名參

將劉福興帶勇四百名剋日渡江助剿嚴飭層
啟綸會合鎮軍穩慎進取並函商鮑超分兵扼
紮丹城之南使援賊不敢覬覦兼斷金壇後路
至沿江下游之賊現已併竄上游而太平洲江
面極窄尤須添船駐紮嚴防窺伺復飭吳全美
酌撥師船馳赴上游堵剿委參領圖普新中槍
陣亡相應請

旨交部從優議卹奏入

上命議政王軍機大臣傳諭富明阿馮子材魁玉曰
揚防官軍渡江援剿將黃墟村及西瓜山逆衆擊
敗立將賊壘踏毀現在賊勢尙衆復於黃墟村一
帶築壘五座意圖牽掣官軍阻遏進攻之路富明
阿已添調總兵楊心純等渡江助剿著卽飭詹啟
綸等聯絡鎮江各營速將賊壘掃除以期會攻丹

陽至鎮江之師前已將丹陽湖埂逆壘攻克進逼西門著馮子材魁玉卽嚴督張文德等前敵各營會合揚防援師互相策應一面聯絡鮑超所部迅將丹陽城池攻拔毋稍遲緩沿江一帶屢有逆匪出竄並有大股欲由江干紮壘爲竄渡太平洲之地沿江下游之賊併竄上游太平洲江面又窄尤須防其搶渡北岸富明阿已飭吳全美酌撥師船

添赴上游堵剿著飭水師各營將士嚴密梭巡毋
稍大意揚營陣亡之委參領圖普新著交部照委
參領陣亡例從優議卹